

## ÈTUR LI VÈT' ÈT L' SÈTCH

D'APRÈS FLORIAN L V

On' ome qu'aveut todi yeû fwè à Jupitêr  
Tûze à sès deûs bauchèles, bin rade bounes à mârier ;  
Èlle ont bèle aparence, brâves, èlle ont tot po plaîre ;  
Leû pa, pinsant bin fé, n' vikeut qu' po l' châtité.  
On fin djon.ne djârdinî tape sès-ouys su l' pus vîye :  
Il îront bin èchone, ça s' veut au prumî còp !  
« Mi, ça m' va ! Vos ossi ? Èvôye po l' vikérîye ! »  
Mins dès novèles di s' fèye, li pa 'nn'a pus biacòp.  
C'èst l' potî do viladje qu'a v'lu mârier l' pus djon.ne ;  
Li pére si r'trove tot seû, i pèstèle èt transsi.  
Nin pus taurd qui l' dîmègne d'après, di l'après non.ne,  
I l'zî va rinde visite po veûy qwè, s' ragaîyi.  
« Bondjoû, fèye ! Qué novèle ? », di-st-i, l'ome, à l' prumêre ;  
« Èt qwè ? A dj' bin tchwèsi ? Èst ç' qui l'ome èst djinti ?  
N'euchîz nin peû dè l' dîre si ça toûnereut foû sqwêre !  
– Mi-y-ome, il èst si bon ! Papa, fioz-è vosse fi ! »  
Li paîs, li grand bouneûr rimplichenut nosse maujone !  
Dji vou yèsse come i faut, i n' tûze qu'à m' fé plaîji ;  
Nin djalous por on sou, nos n'èstans bin qu'èchone !  
Mi, dji boute avou li . Li, i n' vike qui por mi.  
Mins s'i-gn-a one pitite saqwè qui nos manquereûve,  
C'èst saquants gotes di pleuve po-z-aroser l' djârdin ;  
– S' i n' faut qu' ça, Jupitêr, dji vou wadjî qu'i freûve  
Ploûre à sayas vormint, i n'a qu'à stinde si mwin.»  
Noste ome, tot rapaujî, dèmâre po l'ôte bauchèle,  
Èt kènetèr po sawè si, véci, tot toûne rond.  
«Ça n' saureûve aler mia, sauf li solia, pau fèl,  
Qui n' si mostère pus wêre là trwès samwin.nes au long.  
Ça n'arindje nin l's-afaîres po souwer nos poterîyes,  
Èt nos d'jans nos pâtêrs po qu'i lûje chîs solias ;  
L'an passé, parèt-i, èlle èstin.n' totes rostîyes ;  
Ça fait d'abôrd on mwès qu'i ploût, qu'i n' fait nin bia.

Mins vos qu'a todi stî l' soçon da Jupitêr,  
Vos n' lî waserîz d'mander d' nos d'ner on p'tit côp d' mwin ?  
– Là, vos m'imbarassez, vos m' oblidjîz à m' taîre  
Pace qui dj'a deûs-èfants qui n' volenut nin l' minme timps !  
Jupitêr, d'à l' copète, èst sûr li pus capâbe ;  
Prétinde li comander, mi, dji n' pou nin fé ça.  
Il èst mia mètu qu' nos pace qui c'èst li qu'a l' sâbe  
Qui faît l' pluie èt l' bia timps, qui sét ç' qui nos va l' mia.  
I nos-î faut fiyî, i n' nos vout qu' do bouneûr ;  
Si nos purdans pacyince, i nos rècompinserè !  
Lès-omes èt lès coméres, i l'zî vout fé l'oneûr  
Di lès v'lu fé passer pa-d'avant nosse vî Bon Diè.

Albert Delvaux